

Programa Ministeriu Agrikultura no Peskas 2011 vs Agrikultor nia Nesesidade

Husi: La'o Hamutuk

Timor Post, 22 Dezembru 2010

Iha kontekstu Timor-Leste nian, wainhira governu koalia kona-ba dezenvolve povu nia moris, signifika katak governu hakarak dezenvolve agrikultor sira nia moris. Tanba “povu” ida ne'ebé governu temi ne'e, 87% moris nudar agrikultor. No wainhira governu dehan katak aloka Orsamentu Estadu ho montante boot too Dollar Amerikanu Millaun 985 ho objektivu atu dezenvolve povu nia moris, signifika katak alokasaun orsamentu ne'e atu hadiak mos 87% povu ne'ebé moris hanesan agrikultor ne'e nia moris. Maibé iha realidade, orsamenu ne'e atu hadiak duni agrikultor sira nia moris ka lae? no saida mak governu, liu-liu MAP presiza halo atu realiza objektivu ida ne'e?

Artigu ne'e koko haree oinsa alokasaun orsamentu no mos programa governu, liu-liu Ministeriu Agrikultura nian bele hatan duni ba objetivu hadiak agrikultor sira nia moris.

Alokasaun osan Millaun Atus Sia Ualu Nulu Resin (985,000,000) ba orsamentu estadu 2011, inklui mos iha laran orsamentu ba Ministeriu Agrikultura no Peskas. Ministeriu ne'ebé iha relasaun direktamente ho mauizumenus 87% (ema 927,926) povu TL ne'ebé moris hanesan agrikultor. Orsamentu ba ministeriu agrikultura nian hamutuk Millaun Sanulu Resin Rua, Atus Sia Sia (12,909,000) ka 0,013% husi OGE 2011. Se osan ne'e fahe ba agrikultor ida-idak iha Timor-Leste, ema ida sei simu 1,16 Dolar kada fulan. Orsamentu ne'e kiik teb-tebes, no se karik laiha planu ne'ebé koresponde ho orsamentu ne'e sei difisil ba MAP atu halao servisu ida ne'ebé diak liu ba agrikultor sira, liu-liu iha situsaun ohin lora nian ne'ebé setor agrikultura hetan ameasa makaas husi Mudansa Klimatika.

Objetivu Ministeriu Agrikultura no Peskas

Objetivu boot Ministru Agrikultura nian mak: hasa'e produsaun agrikultura, hasa'e rendimentu agrikultor sira nian, no ikus mai hadiak ekonomia agrikultor sira nian. Objetivu ne'e refléta iha asaun balu ne'ebé ministeriu ne'e hala'o ona iha tinan hirak ne'e nia laran hanesan fahe traktor, fini, adubus, hadiak irigasaun no asaun sel-seluk tan (la koalia kona ba sustentabilidade). Asaun sira ne'e rezulta ona iha kresimentu produsaun agrikultura besik 30% iha 2008 no 2009. Maski nune'e nafatin mosu pergunta se kresimentu produsaun ne'e fo impaktu ba hadiak ekonomia agrikultor sira nian ka lae? tanba iha realidade iha produtu agrikultura rai laran barak mak la hetan folin diak iha merkadu.

MAP bele fo razaun katak orsamentu Ministeriu nian kiik liu nune'e la bele dezenvolve agrikultor sira nia moris diak liu tan, razaun ne'ebé iha nia parte loos mos tanba planu bele diak, maibé se orsamentu la natoon, planu nunka bele realiza. Maibé maski iha orsamentu barak, se laiha planu diak, buat ne'ebé mosu mak gasta osan saugati deit. Importante mak planu ne'ebé diak no koresponde ba orsamentu ne'ebé iha, no mos iha sustentabilidade ba futuru. Ezemplu wainhira kompara traktor ho karau, traktor hala'o servisu lais liu, maibe karau mak iha sustentabilidade ba futuru. Traktor nia funsaun ida deit mak atu fila rai. Karau nia funsaun barak liu, bele halai natar, nia foer sai adubus ka halo biogas, nia susuben diak ba saude, nia isin bele sai naan, nia kulit bele halo babadok ka buat seluk tan.

Saida mak Agrikultor sira presiza ohin loron

Atu agrikultor ida bele hetan benefisiu husi dezenvolvimentu agrikultura, iha fator tolu ne'ebé tenki la' o ho diak: produsaun no manejametu produsaun diak, merkadu diak no manejametu ekonomia diak. Atu halo produsaun diak presiza iha rai ne'ebé bokur, bee natoon, fini ne'ebé diak, klima ne'ebé estavel no fasilidade suporta sira seluk hanesan adubus no pestisida. Atu aumentu iha produsaun ne'e bele aumenta mos rendimentu agrikultor nian, sira presiza asesu ba merkadu. Asesu ba merkadu ne'e presiza fasilidade hanesan estrada, transporte no fatin merkadu nian. Agrikultor sira presiza katak sira nia sasan ema hola ho folin ne'ebé diak nune'e sira presiza halo produsaun ne'ebé iha kualidade diak, kapasidade no fasilidade atu maneja ka prosesa ba sira nia produitu atu fan ho folin diak liu tan no protesaun husi produitu agrikultura ne'ebé importa husi rai liur. No wainhira sira hetan rendimentu ne'ebé diak, sira presiza kapasidade atu maneja sira nia rendimentu, sira presiza treinamentu manejametu finanseiru, presiza asesu ba fatin atu rai osan ho funan ne'ebé diak no presiza hatene oinsa sira bele diversifika sira nia rendimentu.

Pasu sira iha leten ne'e pasu ne'ebé simples maibé too agora laiha mudansa signifkante iha agrikultor Timor-Leste sira nia moris tanba pasu sira ne'e la' o ketak-ketak. MAP iha objektivu diak atu hasa'e produsaun, MAP mos iha objektivu diak atu hasa'e rendimentu agrikultor sira nian, maibé MAP presiza planu ne'ebé integradu no koresponde ba povu agrikultor sira nia nesesidade.

Iha planu asaun MAP nian ba tinan ne'e, iha planu lubuk ida atu garantia katak agrikultor sira bele hasa'e produsaun. Planu Asaun MAP nian iha livru 2 OGE la koalia kona ba irigasaun, maibé planu irigasaun lubuk ida inklui ona iha MAEOT nia okos, iha pakote Programa Dezenvolvientu Desentralizadu no mos iha Millaun 1,9 iha Fundu Infrastrutura. Bee mak kestaun krusial ida ba agrikultura iha Timor-Leste oras ne'e, nune'e se problema bee ne'e bele rezolve liu husi sistema irigasaun oi-oin, fator apoiu ida atu hasa'e produsaun maizumenus bele rezolve ona.

Se agrikultor sira iha bee natoon ona, sira iha trator hodi fila rai, sira simu adubus oi-oin (diak liu organiku), sira iha fini ne'ebé diak no sira bele hasa'e produsaun, pergunta tuir fali mai mak saida sira sei halo ho sira nia produsaun alein de ba sira nia konsumu rasik. Sira presiza atu fan sira nia produitu balu. Iha opsaun rua ne'ebé sira bele hili, direktamente fan sira nia produitu primaria ba merkadu ka halo prosesamentu ba sira nia produitu sai forma seluk hafoin mak fan ba merkadu ho folin aas liu. Infelizmente, maioria agrikultor Timor-Leste nian laiha opsaun atu hili. Agrikultor haré sira, fan direktamente sira nia haré ka fos ba merkadu, sira ne'ebé iha kafé fan direktamente sira nia kafe tasak ba kompanhia sira, agrikultor foremungo, nss fan direktamente sira nia produitu ba merkadu ka ba governu (Povu Kuda Governu Sosa). Sira laiha opsaun tanba sira la hetan kapasitasaun no laiha fasilidade atu prosesa sira nia haré ba forma seluk, sira laiha fasilidade atu prosesa sira nia kafé too sai kafé uut no halo falun ne'ebé diak, sira la hetan kapasitasaun no fasilidade atu halo prosesamentu ba sira nia foremungu atu sai susu ben ka produitu seluk, nsst.

Pasu prosesamentu no fan ba merkadu, too agora seidauk hetan atensaun didiak husi governu. Dalaruma MAP hanoin katak servisu ne'e Ministeriu Ekonomia no Dezenvolvimentu ka Ministeriu Turismu Komersiu no Industria nian. Maibé iha realidade governu laiha asaun integradu ida kona ba produsaun, prosesamentu, merkadu no jestaun rendimentu. Programa Povu Kuda Governu Sosa (PKGS) maski ajuda agrikultor balu atu fasil fan sira nia produitu, la hasa'e kapasidade agrikultor sira nian kona ba prosesamentu no merkadu. PKGS rasik mosu tanba razaun baziku rua, 1). Agrikultor sira susar asesu ba merkadu, no 2). Sira nia

produitu la hetan folin diak iha merkadu. Maibé. iniciativa governu sosa agrikultor sira nia produitu ne'e hanesan solusaun ba tempu badak tanba la rezolve problema nia hun: 1). Susar atu asesu ba merkadu, no 2). Produsaun laiha folin diak iha merkadu.

Problema susar atu asesu ba merkadu nia hun mak fasilidade infrastrutura estrada ne'ebé aat, merkadu ne'ebé dook no transporte ne'ebé karun. Problema produsaun agrikultura rai laran folin la diak nia hun mak agrikultor la hetan fasilidade no kapasitasaun atu halo prosesamentu ba sira nia produ primariu, governu laiha kontrolu ba merkadu, importasaun agrikola nakonu iha rai laran, no governu la halo protesau no promosaun ba produitu rai laran. PKGS simplesmente laos programa ne'ebé sustentavel, kria dependensia, la kapasita agrikultor sira no fo benefisiu liu ba kompañia sira ne'ebé sai mediator.

Iha parte kapasitasaun ba agrikultor sira atu maneja diak liu tan sira nia rendimentu no halo diversifikasaun ba sira nia ekonomia, governu mos seidak iha asaun signifikante. Maski iha programa kapasitasaun barak iha governu nia planu asaun tinan kotuk, prioridade boot liu fo ba iha kapasitasaun ba funsionariu publiku hodi haforsa instituisaun governu nian. Tinan 2011 iha tan Fundu ida ba Dezenvolvimentu Kapital Umanu maibé fundu ne'e la koalio kona ba hasa'e kapasidade agrikultor sira nian.

Problema sira iha leten, sai aat liu ho situsaun Mudansa Klimatika ne'ebé fo impaktu makaas ba agrikultor sira nia moris. Tempu udan no bailoro lao la tuir tempu normal, udan boot la para no rai aumenta manas. Planu asaun MAP nian ba tinan 2011 la inklui planu atu hasa'e kapasidade agrikultor sira nian atu adapta-an ba mudansa klimatika.

La'õ Hamutuk nia rekomendasaun:

Susesu husi dezenvolvimentu agrikultor iha rai laran la depende deit ba orsamentu hira mak aloka ba MAP. Susesu MAP nian, depende ba Programa ne'ebé koresponde ba Agrikultor sira nia nesesidade. Orsamentu MAP nian tenki responde ba nesesidade agrikultor ohin loron no ba futuru, no se atu responde nesesidade agrikultor sira nian ne'e presiza orsamentu boot, governu tenki aloka orsamentu ne'e, tanba setor agrikultura mak futuru Timor-Leste nian, laos mina ne'ebé loron ida sei hotu. Espesifiku liu ami rekomenda ba Governu no MAP no Governu Timor-Leste atu halo planu konkretu kona ba:

1. Hasa'e produsaun agrikultura liu husi dalan nebe sustentavel, katak la estraga rai, bee, meuambiente no futuru agrikultor sira nian;
2. Hasa'e kapasidade agrikultor sira nian no fasilita sira atu hatene oinsa maneja no halo prosesamentu ba sira nia produitu atu bele hetan folin nebe diak liu iha merkadu;
3. Hasa'e kapasidade agrikultor sira nian kona ba asesu ba merkadu, jestaun ba sira nia rendimentu no diversifika sira nia ekonomia;
4. Suporta agrikultor sira hasa'e kualidade no halo promosaun ba produitu rai laran.
5. Halo investigasuan klean kona ba impaktu mudansa klimatika ba agrikultor sira no hasa'e sira nia kapasidade atu halo adaptasaun.
6. Proteze no promove produitu agrikultura rai laran liu husi halo limitasaun ba importasaun produitu agrikultura ne'ebé bele produz iha rai laran;

Agrikultura nunka hotu. Agrikultor moris ba nafatin. Viva Agrikultor Timor-Leste.